

宋詩鈔補

一  
玉  
八  
冊  
玉

疊山集鈔

續修四庫全書

謝枋得字君直號疊山信州弋陽人寶祐四年進士咸淳中爲江東提刑江西招諭使景炎帝以枋得爲江東制置使卽弋陽起義兵軍潰隱于閩元徵聘累辭不就後福建行省魏天祐迫脅至燕不食死門人誄之曰文節先生有疊山集

謝人冬至送酒鴨

陽復且閉關萬物畏坤含雙鳧飛天外鷺食何貪婪儒道又一  
秦十年亂愈餓誰家讀書堂庭階無青薄此時談詩書蓮經提  
魚籃平生太玄文知者無一譚之子愛野鷺驥駒舞兩驂厚顏  
酒食饌不獵懸鶉鷓寒威甚毒矢三杯勝七鎗爛醉尋梅花登  
峯吾尙堪

菖蒲歌

有物奇峭天琢成。有草夭夭冬夏青。□□菖蒲非一種。上品九節通僊靈。異根不帶塵埃氣。孤操愛結泉石盟。明窗淨几有宿契。花林草砌無交情。夜深不嫌霜露重。晨光疑有白雲生。神農已知入本草。靈均蔽賢遺騷經。幽人耽翫發僊興。方士服餌延修齡。綵鸞紫鳳琪花苑。赤虬玉麟芙蓉城。上界真人好清淨。見此靈苗當大驚。我欲攜之朝太清。瑤草不敢專芳馨。玉皇一笑留香案。錫與有道者。長生人間千花萬草儘榮艷。未必敢與此草爭高名。

荊棘中杏花

墻東荒蹊抱村斜。荊棘狼籍盤根芽。□□丹杏此留種。小紅濺濺爭春華。野人慣見謾不省。獨有詩客來咨嗟。天真不到鉛粉

筆富艷自是宮闈花。曲池芳徑非宿昔。蒼苔濁酒洞天涯。京師惜花如惜玉。曉檐賣徹東西家。杏花看紅不看白。十日忙殺遊春車。誰家園裏有此樹。鄭重已着重幃遮。阿嬌新寵貯金屋。明妃遠嫁愁清笳。落花紫簾拂牀席。亦有飄泊沾泥沙。天公無心物自物。得意未用相凌誇。黃昏人歸花不語。惟有落月啼棲鴉。崇真院絕粒。偶書付兒熙之定之。并呈張蒼峯劉洞齋華甫。

甫

西漢有臣龔勝。卒閉口不食十四日。我今半月忍渴饑。求死不死更無術。精神常與天往來。不知飲食爲何物。若非功行積未成。便是業債償難畢。太清羣僊宴會多。鳳簫龍笛鳴瑤瑟。豈無道兄相提攜。騎龍直上寥天一。

和道士陳天隱

學道無魔道不成。神人得計是無名。光風自覺長瀟灑。明月何曾有死生。早晤口山難養性。何如福地別尋盟。梅花香裏堪聯句。莫笑人間石鼎鳴。

送程楚翁遠遊

近日人傳庾嶺梅。南枝落盡北枝開。長安舊日元無此。盡是江南人送來。

寄謝叔魯

紅葉飄搖霜露清。去年今日正同行。夜來似與君相見。明月一窗梅影橫。

蠶婦吟

子規啼徹四更時。起視蠶稠怕葉稀。不信樓頭楊柳月。玉人歌舞未曾歸。

北行別人

雪中松栢愈青青。扶直綱常在此行。天下豈無龔勝潔。人間不獨伯夷清。義高便覺生堪捨。禮重方知死甚輕。南八男兒終不屈。皇天上帝眼分明。

求紙衾

避世知無地。危身只信天。寧持龔夫

勝一作

扇。不著挺子綿。養性

真同道。知心有宿緣。紙衾加惠絮。晴日臥雲邊。

春日聞杜宇

杜鵑日日勸人歸。一片歸心誰得知。望帝有神如可問。謂予何日是歸期。

慶全庵桃花

尋得桃源好避秦。桃紅又見一年春。花飛莫遣隨流水。怕有漁

郎來問津。

武夷山中

十年無夢得還家。獨立青峯野水涯。天地寂寥山雨歇。幾生修  
得到梅花。

白石樵唱集補鈔

林景熙字德暘號霽山溫州平陽人咸淳辛未上舍釋  
褐授泉州教授歷禮部架閣轉從政郎宋亡不出與王  
修竹鄭樸翁胡天放輩尋歲晏之盟往來吳越庚戌卒  
于家有白石樵唱集

曉意

僧鐘覺曙鳥紛飛弄林光宿雲漸離石我起開秋房南山忽入  
几相對各老蒼我老幾何年山曾見鴻荒流泉送日月危石支  
興亡問山山無言啼猿起前岡

秋夜

片月相隨過竹居風生荷葉酒醒初窗扉半掩秋蟲急猶有殘  
燈守故書



飛來峯

何年移竺國。秀色發稜層。清極不知夏。虛中欲悟僧。樹幽嵐氣重。泉落乳花凝。猶憶烹茶處。閒來話葛藤。

宋武帝居今爲壽丘寺

青衣夢破滿林煙。一擲乾坤亦偶然。僧屋翠微看月上。江山猶似永初年。

立春郊行次唐玉潛

道人清事飯溪蔬。無酒閑愁已破除。五夜雪聲梅角底。一春煙景竹筇初。園林芳信醒愁蜨。田野豐年入夢魚。冰下流泉清老耳。東風先已到郊居。

送春

蜀魄聲聲訴綠陰。誰家門巷落花深。游絲不繫春暉住。愁絕天

涯寸草心

南山有孤樹

南山有孤樹。寒鳥夜遶之。驚秋啼眇眇。風撓無寧枝。託身未得所。振羽將逝茲。高翔犯霜露。卑飛觸茅茨。乾坤豈不容。顧影空自疑。徘徊向斜月。欲墮已復支。

故衣

篋中出故衣。絡緯聲四壁。昔年慈母線。一一手所歷。眷眷遊子心。惻惻虛堂夕。逝水不返流。孤雲杳無迹。空令攬衣人。一線淚一滴。衣敝奈有時。母恩無窮期。終憐寸草心。何以報春暉。朝寒縱砭骨。念此不忍披。且復返所藏。永寄霜露思。

九日會連雲樓分得落字

冉冉海霧深。荒荒山日薄。登高集華裾。縱目天宇廓。落葉悲徂

年寒英照深酌。心醉乃文字。意行非澗壑。緬懷斜川遊。此道久  
寂寞。胡爲吹帽人。白首戀賓幕。窮途謬行藏。異代懸美惡。我愛  
漉酒巾。西風不能落。

訪二陸故居

風流懷二陸。才名動三吳。斯人不可作。千載空煙蕪。當時騁俊  
筆。萬象爭先驅。有如明月璧。美價傾鴻都。世運有翻覆。韞匱眞  
良圖。惜哉去就乖。毀此千金軀。人生皆有死。百年同須臾。獨遺  
文字芳。乃與天壤俱。淒淒崑山寒。冉冉谷水枯。白鶴久已寂。黃  
犬誰復呼。荒祠掛斜陽。扁舟入菰蒲。采蓴薦秋水。庶以明區區。  
納涼過林氏居

出郭已虛曠。入門轉蕭森。筠栖無六月。聊以解我襟。紅日不到  
地。白雲時滿林。坐久石根冷。酒醒荷氣深。飄飄黃冠客。臨流鼓

瑤琴一鼓洗我耳。再鼓空我心。山高水復迴。彷彿蓬萊音。興盡拂衣去。城笳吹夕陰。

妾薄命

盈盈梁家姝。奕奕晉朝使。斛珠不論貲。得備巾櫛侍。一笑金谷春。列屋俱歛避。豈知錦步溫。已復爲愁地。念主惠妾深。緣妾爲主累。樓頭風雨深。殘花抱春墜。

別所親

人生重離別。况此雙鬢蓬。亭柳非故色。昨夜吹霜風。臨分復攜手。野色猶濛濛。愁深轉無語。寫入潺湲中。一水分兩支。來共高峯出。山暫相失。到海終相逢。

過風門嶺

客來自風門。颼颼撼兩袖。溪迴衆峯新。阪絕一嶺又。行行春日

微怪禽啼白晝。流年感花稀。古道表松秀。聊此寄小酌。餘酣掬  
山溜。

古松

獨占寬閒地。不知遙落天。山林猶古色。風雪自窮年。龜伏靈根  
壽。禽巢絕頂僊。棟梁非所屑。幾見海成田。

崑巖

神斧何年鑿。南山片石盤。玉藏仙笥古。翠落縣門寒。老木天邊  
瘦。歸雲雨外殘。市塵吹不到。朝夕靜相看。

桐角

田家無律呂。聲寄始華桐。碧卷春風老。清吹野水空。客心寒食  
後。牛背夕陽中。不惹梅花恨。年年送落紅。

飛雲渡

人煙荒縣少。澹淡隔秋陰。帆影分南北。潮聲變古今。斷峯僧塔遠。初日海門深。小立蘆風起。乘槎動客心。

寄懷

圖上追三笑。詩中寄七哀。孤棲非絕物。多難亦成才。歲儉米生竹。春寒衣上苔。不知遼海客。化鶴幾時回。

神山寺訪僧

獨客無清伴。高僧住別村。空山卓錫影。斷石繫舟痕。風細松生籟。沙虛竹走根。小亭閒坐久。落日嘯孤猿。

夜意

澹然無一事。至樂在書牀。老石棲雲定。疎松過雨香。砧清秋巷迥。燈白夜堂涼。此意無人會。重城醉夢鄉。

天台隱者

俗駕不曾到。瘦筇時復攜。肺肝清澗飲。髻髮老巖棲。野巷猶雞犬。春城自鼓鞞。未應人世外。別有武陵溪。

贈吳秀才林東歸

幾夜高堂夢。不知山水長。西風歸雁蕩。落日過烏傷。斷影雲空白。孤心草欲黃。終憐負甘旨。淚灑蓼莪章。

越中送徐君寅歸閩

此地同爲客。當秋獨送君。斜陽留薄醉。遠道惜輕分。老泪遺陵木。鄉山出海雲。天南有回雁。音信倘相聞。

故宮

驚風吹雨過。歷歷大槐蹤。王氣銷南渡。僧坊聚北宗。煙深凝碧樹。草沒景陽鐘。愁見花甄月。荒秋咽亂葦。

辟雍

冠帶百年夢。昔遊今重嗟。璧池春飲馬。槐市暝藏鴉。堂鼓晨昏寂。廊碑風雨斜。石經雖不火。歲歲長苔花。

舟次吳門

懷古心猶壯。臨流影自孤。湖煙迷櫓李。城木出姑蘇。草暗春驚鹿。菰香秋試鱸。青樓舊時月。無復聽吳歎。

釣臺

曾來天上宿。夢不離寒磯。宇宙雙臺迥。煙波一客歸。姓增江郡重。墓隔越山微。千古登臨意。淒涼帶夕暉。

過北雁蕩山下

驛路入芙蓉。秋高見早鴻。蕩雲飛作雨。海日射成虹。一水通龍穴。諸峯盡佛宮。如何靈運屐。不到此山中。

禹廟



萬國曾朝會。羣山尙鬱盤。嚴祠鎮玄璧。故代守黃冠。窆入雲根古。梁歸雨氣寒。年年送春事。來拂薜碑看。

荷錢

盈盈新疊碧。難借柳條穿。鑄景菰蒲外。買隣鷗鷺邊。炎官初掌柄。水國不書年。漸長薰風價。折筩供酒船。

漁笛

楚竹聲何遠。蒼茫想釣舟。橫當半篷月。吹破一江秋。落葉紛前浦。驚鴻過別洲。曲終枕簟臥。無夢到涼州。

雪後

開簾殘酒醒。雪意尙垂垂。夜色沈奎久。春容變柳遲。寒塘鷗自聚。荒歲鶴同飢。便欲誅茅隱。何山有紫芝。

山中早行